



Siverth K. Heilmann

UPA 2022/172

Atassut

05. Maj 2022

Ukiumoortumik akileraartarnermut allagartamut nassiussinermi ilangussatut akileraarutit procentinngorlugit kommuneni Namminersorlutilu Oqartussat ataani susassaqarfinnut sorlernut tamakkiisumik aningasartuutit procentinngorlugit takussutissaqalernissaat pillugu Naalakkersuisut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortaq Aqqalu C. Jerimiassen, Atassut)

Qinersiartoraangatta inuk qinertarparput tatisarpuit, taassumami akileraartartuusugut akileraarutigut sumut atorneqassanersut aalajangeeqataaffigisussaammagit. Ilisimavarpullu akissarsigaangatta akissarsiatta qassi procentii akileraarutigisarnerlugit. Taassumali kingorna paasineq ajorparput akissarsiatta affangajai politikkeriniit sumut atorneqartarnersut.

Aningaasanut inatsit, atuagaq quppernerit 700-uusut aap atuarsinnaavarput innuttaasutut paaserusukkutsigu aningasat qanoq agguataarlugit atorneqartarnersut. Kisianni kiap ulluinnarni taanna atuagaq atuassammagu?

Innuttaasut ajornannginnerusumik paasitinneqartariaqarput aningasaatitik sumut atorneqarsimanersut. Uanilu siunnersuut periafissiilluartutut isigaarput. Ukiumoortumimmi akileraartarnermut allagartaq tigugaangatsigu takusinnaavarput qanoq akileraartigissanerluta. Siunnersummilu kissaatigineqarpoq, naatsumik ajornanngitsumillu akileraaruterpassuatta tamakkiisumik procentinngorlugit susassaqarfinnut pingarnernut sorlernut atorneqarsimanersut.

Assersuutigalugu peqqinnissaqarfimmut qanoq annertutigisumik aningasartuuteqarpugut? Soormiuna taava akileraartuartaraluarluta nakorsiarluuaannartartugut? Immaqaluunniit ilinniartitaanermut qanoq annertutigisumik aningasartuuteqarpugut? Soormiuna taava ilinniarlutik naammassisartut suli ikippallaartut? Kiisalu akileraarutitta qassi procentii qitiusumiit allaffissornikkut atorneqartarpat?

Oqartoqarpoq kisikkuminaatsoq, akisuallaassasoq aamma pisariualaassasoq taamatut paassisutissiissalluni. Imak ajornanngitsigisinnaagaluarpoq, susassaqarfiit, oqartussaaffiillu pingarnerit qulit allallugit, sinaatungaanilu qassi miliuunit, milliardilluunniit taakkununnga atorneqarsimanersut, kiisalu nunatta karsianiit aningasartuutaasunut qassi procentiuersut allallugit.

Aporfissalersuinnarnagu ajornanngitsumik aaqqiissuteqarneq ujartortigu, pappiliaagaluarpat, digitaliusumik siammeraluarpat, nittartakkakkulluunniit ersersinneqarpat



apeqqutaatippallaarnagu, takuneqarsinnaalersikkusuinnarparput innuttaasut akileraarutaat sumut atorneqartarnersut. Ilami isertuussaasariaqanngillat.

Tassami itigartiinnassagutsigu innuttaasut eqqarsalersissavagut arlaannik isertugaqartugut. Aningaasaqarnerput ammasumik ingerlatsigu, tamat oqartussaaqataanerat nukittorsartigu, ammasumik takussutissiisa akileraartartut akileraarutaat sumut atorneqartarnersut.

Taamatut oqaaseqarluta Atassummiit siunnersuut tamakkiisumik taperserparput, ajornanngitsumillu siunertap piviusunngortinneqarnissaanut oqallinneq nangissinnaaniassammat akileraartarnikkut aningaasaqarnikkullu ataatsimiititaliami eqqartoqqinneqarnissaa ammaffigaarput.